

10.11.2002 Das Gemeindeamt - "Alte Schule" wird saniert

Žórto: SN 10.11.2002

Nimo sobudźělačerjow Radworskeho gmejnskeho zarjada wjeseli so předewšěm wjesnjanosta Wincenc Baberška, zo je přetwar stareje šule wotzamknjeny. Mjez druhim maja nětko rjanu posedźensku rumnosć. Nowy wonkowny napohlad je nětko tež Radworska stara šula, w kotrejž ma gmejnski zarjad swoje sydło, dóstała, po tym zo su zašće lěta tamnišu nawjes dospołnje přetwarili. Móžna bu tuta twarska naprawa we wobłuku spěchowanskeho statusa wsy, kotryž je loni kónc junija wuběžał. Krótko do toho su próstwu wo spěchowanske srědki stajili a je tež za hłowny džěl twarskich kóštow we wysokosći 75 procentow přizwolene dóstali. Dohromady su 170 000 eurow do saněrowanja inwestowali a při tym třěchu, wokna, fasadu a durje ponowili. Do třěchi zatwarichu dvě woknje, tak zo změja tam raz městno za gmejnski archiw, kotryž je tuchwilu hišće dosć rozbrojeny. Při wupytanju woknow, durjow a barby za fasadu je architekturny běrow Ehrlich ze serbskim sobudźělačerjom Měrkom Šěrakom wusko z wjesnym planowarjom hromadže džělał, tak zo so wonkowny napohlad domu derje do wokoliny hodźi. Stóž tele dny nimo njeho jědže, tomu napadnje, zo njeje pomjatna tafla za kapłana Alojsa Andrickeho hižo na swoim městnje. Tuta pak so tohorunja ponowja a so bórže zaso na zwučene městno wróci. Dale su we wobłuku twarskich džělow mały přitwark při zadnim zachodže wotstronili, w kotrymž bě tak mjenowany suchi nuznik za wobydlerjow hornjeho poschoda. Swójba, kotraž nětko hišće na starej šuli bydli, dósta kompletnje nowu kupjel do bydlenja zatwarjenu, nimo toho centralne tepjenje, tak zo so tež za nju bydlenske wuměńjenja polěpšichu. Wobstejace běrowowe rumnosće su tohorunja zdžěla přetwarili a wobnowili. Klětu póndže z twarskimi džělami dale. Potom chcedža schody w domje ponowić a wonka někotre parkowanske městna připrawić.

From:

<http://82.165.187.122/> - Radibor - Chronik

Permanent link:

<http://82.165.187.122/doku.php?id=2002&rev=1621198245>

Last update: **2021/05/16 20:50**

